



Broj: 01-04-2217/25-AP-6  
Datum: 30.10.2025. godine

**Z A P I S N I K**  
**( I Z V O D )**

sa 11. sjednice Gradskog vijeća Zavidovići koja je održana, dana 30.10.2025. godine (četvrtak) sa početkom u 16:00 sati u Velikoj sali zgrade gradskih organa Grada Zavidovići.

Sjednici Gradskog vijeća prisustvovalo je 27 vijećnika: Avdičević Zahid, Avdičević Amer sjednici se pridružio u 16:40 sati, Bašić Mirela, Buljubašić Demir, Čosić Omer, Dendić Sanela, Delić Elvira, Džindo Asim, Fejzić Rijad, Huskić Elvedin, Huskić Hasib, Ikanović Dževad, Javrić Bajro, Karajbić Anes, Pašić Indira, Sanel Jalmanović sjednici se pridružio u 16:40 sati, Sinanović Asim, Sinanović Azra, Skejić Šemsudin, Šimšić Igor, Tursić Amir, Indira Halilčević, Admir Fojnica, Semir Šehić sjednici se pridružio u 16:06 sati, Haris Hodžić, Amir Mehić, Amra Jupić.

Odsutni vijećnici: Hadžić Amira, Ajdin Polić.

Ostali prisutni: Sekretar Gradskog vijeća – Samira Pinjić, Sekretar gradskog organa državne službe - Nermin Čahtarević, Idriz Alihodžić – Pomoćnik Gradonačelnika Službe za upravu poljoprivrede, vodoprivrede i komunalnih poslova, Remzo Sinanović – Pomoćnik gradonačelnice Službe za upravu geodetskih, imovinskopravnih poslova i urbanizma.

Zapisnik i ostale administrativno tehničke poslove obavljali – Dženan Ćatić – lice na stručnom osposobljavanju u službama za upravu i posebnim službama Grada Zavidovići, Vanesa Sačić – viši referent Stručne službe Gradskog vijeća.

Poslove videosnimanja i livestreama vršio državni službenik Irnes Avdić - Stručni saradnik za informatiku, poslove administratora i računarske mreže, Stručna služba gradonačelnika.

Ispred sredstava informisanja sjednici prisustvovali: Željko Šlipogor - „Radio 1503 Zavidovići“ d.o.o. Zavidovići.

Na osnovu člana 81. Poslovnika o radu Gradskog vijeća Zavidovići, Zamjenik predsjedavajuće Gradskog vijeća predlaže verifikaciju Zapisnika (Izvod) sa 10. sjednice Gradskog vijeća održane dana 30.09.2025. godine, te poziva vijećnike da ulože primjedbe na Zapisnik, ako iste postoje.

Vijećnik Amir Tursić ulaže primjedbu na Zapisnik sa 10. sjednice Gradskog vijeća.

Amir Tursić: „...iako je to služba zaista fino prikazala, ali imam jednu primjedbu glede inicijative koju sam ja podnio, treba da se doda u ime Kluba vijećnika SDA, jer svi skupa stojimo iza te inicijative, a ne samo ja lično. Zahvaljujem.“

Demir Buljubašić: „Ispravka će biti tehničke prirode, tako da prihvatamo primjedbu i biti će ispravljeno.“

Zamjenik predsjedavajuće daje Zapisnik na glasanje.

Nakon provedenog glasanja predsjedavajuća konstatuje da je Zapisnik sa 9. sjednice Gradskog vijeća sa 25 glasova ZA, 0 glasova PROTIV, 0 glasova UZDRŽANO, dobio potrebnu većinu te je isti usvojen.

## ZAKLJUČAK

1. Gradsko vijeće Zavidovići usvaja Zapisnik (Izvod) sa 10. sjednice Gradskog vijeća Zavidovići, održane dana 30.10.2025. godine, sa primjedbom da se na strani 4. Ad.1 Vijećnička pitanja, inicijative i odgovori, iza imena Amir Tursić upišu riječi: „u ime Kluba vijećnika Stranke demokratske akcije“.

2. Zaključak stupa na snagu odmah.

Zamjenik predsjedavajuće daje pauzu u trajanju od 10 minuta, te poziva Kolegij Gradskog vijeća na sastanak u Malu salu.

**(pauza 10 minuta)**

Za 11. sjednicu Gradskog vijeća Zavidovići predložen je sljedeći:

### **Dnevni red:**

1. Vijećnička pitanja, inicijative i odgovori.

Razmatranje vijećničkih inicijativa:

a) Inicijativa vijećnika Omera Čosića za sanaciju i rekonstrukciju Omladinskog doma Potkleče.

b) Inicijativa vijećnice Mirele Bašić za sufinansiranje dijela troškova izgradnje planinarskog doma.

c) Inicijativa vijećnice Sanele Dendić za modernizaciju i zamjenu neispravnih rasvjetnih tijela u ulici „Alije Izetbegovića“.

2. Prijedlog Odluke o davanju na korištenje poslovnih prostorija u vlasništvu Grada Zavidovići Javnoj ustanovi „Kulturno-sportski centar“ Zavidovići.

3. Prijedlog Odluke o izmjenama Odluke o nerazvrstanim cestama na području općine Zavidovići.

**(izvjestilac po tačkama 2. i 3.: Džeraldina Miličević, pomoćnik gradonačelnika Službe za upravu privrede, lokalni razvoj, infrastrukturu i međunarodnu saradnju)**

4. Prijedlog Odluke o davanju saglasnosti za prenos vlasništva i posjeda.

**(izvjestilac: Idriz Alihodžić, pomoćnik gradonačelnika Službe za upravu poljoprivrede, vodoprivrede i komunalnih poslova)**

5. Razmatranje Inicijative Mjesne zajednice „Branioci grada“ za formiranje komisije.

**(izvjestilac: Džeraldina Miličević, pomoćnik gradonačelnika Službe za upravu privrede, lokalni razvoj, infrastrukturu i međunarodnu saradnju)**

6. Razmatranje Inicijative Udruženja građana „Jedinstveno udruženje demobilisanih boraca '92. – '95.“ Zavidovići za donošenje Odluke o imenovanju i proglašenju u naziv (Trg heroja odbrambeno-oslobodilačkog rata) prostor centralnog Spomenika poginulih boraca 92/95.

**(izvjestilac: Jasmin Mahmutović, pomoćnik gradonačelnika Službe za upravu društvenih djelatnosti, pitanja boraca i opću upravu)**

Zamjenik predsjedavajuće upoznaje Vijeće sa Prijedlogom promjene dnevnog reda 11. Sjednice Gradskog vijeća Zavidovići, pristiglog od strane Gradonačelnice, na način da se sa dnevnog reda skida tačka 4. Prijedlog Odluke o davanju saglasnosti za prenos vlasništva i posjeda, a tačke 5 i 6 postaju tačke 4 i 5.

Zamjenik predsjedavajuće predlaže izmijenjeni

### **Dnevni red:**

1. Vijećnička pitanja, inicijative i odgovori.

Razmatranje vijećničkih inicijativa:

a) Inicijativa vijećnika Omera Čosića za sanaciju i rekonstrukciju Omladinskog doma

Potkleče.

b) Inicijativa vijećnice Mirele Bašić za sufinansiranje dijela troškova izgradnje planinarskog doma.

c) Inicijativa vijećnice Sanele Dendić za modernizaciju i zamjenu neispravnih rasvjetnih tijela u ulici „Alije Izetbegovića“.

2. Prijedlog Odluke o davanju na korištenje poslovnih prostorija u vlasništvu Grada Zavidovići Javnoj ustanovi „Kulturno-sportski centar“ Zavidovići.

3. Prijedlog Odluke o izmjenama Odluke o nerazvrstanim cestama na području općine Zavidovići.

4. Razmatranje Inicijative Mjesne zajednice „Branioci grada“ za formiranje komisije.

**(izvjestilac po tačkama 2. - 4.: Džeraldina Miličević, pomoćnik gradonačelnika Službe za upravu privrede, lokalni razvoj, infrastrukturu i međunarodnu saradnju)**

5. Razmatranje Inicijative Udruženja građana „Jedinstveno udruženje demobilisanih boraca '92. — '95.“ Zavidovići za donošenje Odluke o imenovanju i proglašenju u naziv (Trg heroja odbrambeno-oslobodilačkog rata) prostor centralnog Spomenika poginulih boraca 92/95.

**(izvjestilac: Jasmin Mahmutović, pomoćnik gradonačelnika Službe za upravu društvenih djelatnosti, pitanja boraca i opću upravu)**

Zamjenik predsjedavajuće daje izmijenjeni dnevni red na glasanje.

Nakon provedenog glasanja zamjenik predsjedavajuće konstatuje da je dnevni red 11. sjednice Gradskog vijeća sa 25 glasova ZA, 0 glasova PROTIV, 0 glasova UZDRŽANO, dobio potrebnu većinu te je isti usvojen.

## ZAKLJUČAK

1. Gradsko vijeće Zavidovići usvaja predloženi dnevni red 11. sjednice Gradskog vijeća Zavidovići, s tim da se tačka 4. predloženog dnevnog reda, koja glasi: „4. Prijedlog Odluke o davanju saglasnosti za prenos vlasništva i posjeda.“, skida s dnevnog reda, a tačke 5. i 6. postaju tačke 4. i 5.

2. Zaključak stupa na snagu odmah i čini sastavni dio dokumentacije Gradskog vijeća.

## Rad po dnevnom redu

**Ad.1** Vijećnička pitanja, inicijative i odgovori.

**Haris Hodžić u ime Kluba SDP**

**PREDMET: Inicijativa Kluba SDP**

„Inicijativa za donošenje odluke o dodjeli jednokratne novčane pomoći penzionerima sa područja Grada Zavidovići za 2025. i za 2026. godinu

Poštovani, na osnovu člana 109. Poslovnika o radu Gradskog vijeća Zavidovići, u ime Kluba vijećnika Socijaldemokratske partije BiH u Gradskom vijeću Zavidovići podnosim INICIJATIVU za donošenje Odluke o dodjeli jednokratne novčane pomoći penzionerima sa područja Grada Zavidovići za 2025. i za 2026. godinu

U skladu sa stavom 4. pomenutog člana ovu Inicijativu dostavljamo u pisanoj formi sa OBRAZLOŽENJEM kako slijedi:

Obzirom da su penzioneri jedna od najugroženijih kategorija našeg stanovništva koja je u posljednjem periodu pogođena rastom cijena energenata, lijekova i osnovnih životnih namirnica, potrebno je iskazati dodatni angažman svih nivoa vlasti u realizaciji finansijske pomoći i podrške ovoj socijalnoj kategoriji društva. Imajući u vidu da je Vlada Federacije BiH

već pružila jednokratnu finansijsku pomoć penzionerima, te da je i Vlada ZE-DO kantona, također, najavila finansijsku pomoć za tekuću i narednu kalendarsku godinu, smatramo da je potrebna solidarnost i briga i lokalnog nivoa, te predlažemo da Gradsko vijeće donese Odluku o dodjeli jednokratne novčane pomoći penzionerima sa područja Grada Zavidovići za tekuću 2025. godinu kao i za narednu 2026. godinu.

Ovom inicijativom se zadužuje Gradonačelnica i nadležna Gradska služba da u saradnji sa PIO fondom utvrdi tačan broj penzionera sa područja Grada Zavidovići, predloži iznos jednokratne pomoći i obezbijedi sredstva za realizaciju inicijative rebalansom Budžeta Grada Zavidovići za 2025. godinu i Budžetom Grada Zavidovići za 2026. godinu, S poštovanjem.“

### **Admir Fojnica**

#### **PREDMET: Vijećnička inicijativa**

„Inicijativa za izgradnju terena za boćanje na području Grada Zavidovići.  
Poštovani/a, na osnovu člana 109. Poslovnika o radu Gradskog vijeća Zavidovići, podnosim Inicijativu za izgradnju terena za boćanje na području Grada Zavidovići.

U skladu sa stavom 4. pomenutog člana inicijativu dostavljam u pisanoj formi.

#### **OBRAZLOŽENJE :**

Na prijedlog članova Saveza sa sport i rekreaciju invalida Grada Zavidovići, kao vijećnik u Gradskom vijeću Zavidovići podnosim Inicijativu za izgradnju terena za boćanje. Boćanje je tradicionalna sportska igra, izuzetno popularna u Bosni i Hercegovini kao i u zemljama regije. S obzirom da jedan takav teren postoji u gotovo u svakom gradu BiH, smatram da bi urađen i u našem gradu okupljao veliki broj rekreativaca kako mlađe, tako i starije populacije.

Lokacija koja bi bila najbolja za izgradnju jednog takvog terena je pored terena za šah koji je u pripremi, razlog tome je što ima sasvim dovoljno prostora ili da Grad iznađe neku novu lokaciju. Za izgradnju samog terena i nabavku rekvizita za igru potreban je iznos do 5000 KM, koji se može planirati u Budžetu za 2026. godinu.“

### **Mirela Bašić**

#### **PREDMET: Vijećnička inicijativa**

„Na osnovu člana 109. Poslovnika o radu Gradskog vijeća Zavidovići, podnosim inicijativu za asfaltiranje Ulice „Hasana Kikića“, u naselju Podubravlje, Mjesna zajednica Dubravica.

#### **Obrazloženje:**

Ulica „Hasana Kikića“, u naselju Podubravlje, Mjesna zajednica Dubravica, jedna je od gradskih ulica koja nema izgrađenu adekvatnu putnu infrastrukturu i gdje prethodnih godina nisu vršena dostatna ulaganja. Dio ove Ulice, u dužini od cca 150 metara, nekad je izbetoniran, ali usljed uticaja vremena i očito nedovoljno kvalitetno izvedenih radova, taj dio puta počeo je propadati, tako da su armaturne mreže počele ispadati iz betona i ugrožavati bezbjednost učesnika u saobraćaju i njihove imovine.

Taj dio puta, u dužini od cca 150 metara, potrebno je hitno sanirati, odnosno asfaltirati, kako i dolikuje jednoj gradskoj ulici.

Također, u narednom periodu potrebno je planirati nastavak uređenja preostalog dijela Ulice Hasana Kikića u dužini od cca 180 metara, čime bi se ova Ulica uredila na adekvatan način.“

### **Amra Jupić**

#### **PREDMET: Vijećničko pitanje**

„Ja ću postaviti pitanje nadležnoj službi. Na ovo pitanje odgovor tražim u pisanoj formi.

Naime interesuje me, ulica „Stjepana Radića“, već duže vremena imamo pritužbe naših sugrađana koji žive na tom području, u toj ulici. Žale se na uznemiravanje različitih prevoznih sredstava, bilo noću bilo danju, njihovi životi i životi njihovih porodica su ugroženi, noćima ne mogu da spavaju. Mene interesuje, da li je signalizacija u ulici „Stjepana Radića“ urađena u skladu sa Zakonom o saobraćaju Federacije BiH, ako nije da mi se odgovori, da mi se navede tačno šta nedostaje, koji to znakovi nedostaju, da li nedostaju ležeći policajci možda, i sve ostalo od obavezne saobraćajne signalizacije. Već nekako mogu reći najavljujem potencijalnu inicijativu, ako odgovor bude negativan da nešto od zakonskih obaveza nije ispunjeno, odmah ću u najkraćem roku podnijeti inicijativu da se sve glede obavezne signalizacije ispuni kako životi naših građana ne bi bili ugroženi.“

### **Zahid Avdičević**

#### **PREDMET: Vijećnička inicijativa i vijećničko pitanje**

##### **Vijećnička inicijativa**

„Na osnovu člana 109. Poslovnika o radu Gradskog vijeća Zavidovići, predlažem sljedeću Inicijativu.

Inicijativa se odnosi na izmjenu Odluke o obilježavanju značajnih datuma Grada Zavidovića.

Izmjene predmetne Odluke odnosile bi se u dijelu nosioci aktivnosti gdje su mjesne zajednice izostavljene, a trebale bi biti u istom položaju kao i ostali nosioci aktivnosti prilikom obilježavanja značajnih datuma. Također, trebalo bi izmijeniti i način finansiranja samih manifestacija, odnosno samom Odlukom definisati raspodjelu sredstava.

Obrazloženje inicijative:

Mjesne zajednice nisu dovoljno uključene u aktivnosti pomenutih događaja, a jedan od razloga je što u postojećoj Odluci nisu definisani kao nosioci aktivnosti.  
S poštovanjem.“

##### **Vijećničko pitanje**

„Ne znam ko je organizator, ali zamolit ću Stručnu službu Gradskog vijeća, da ne bude uvijek da ja nešto protiv te Službe, to je Služba koja treba da pomaže Gradskom vijeću i Kolegiju i klubovima vijećnika. Od sad na moj stol nemojte da donosite vodu sa predizbornim sloganom ničijim. Ni od moje stranke Građanskog saveza, nit od koje druge. Donesite mi običnu vodu, ili nemojte donositi ništa. Hvala, prijatno.“

### **Igor Šimšić u ime Kluba SDP**

#### **PREDMET: Vijećnička inicijativa**

„Na osnovu člana 109. Poslovnika o radu Gradskog vijeća Zavidovići, podnosim inicijativu za donošenje odluke o izradi projektne dokumentacije, rekonstrukcije i aktivnosti izgradnje ulice „Matije Gupca“, sa svim pratećim elementima saobraćajnice.

Obrazloženje:

Sam izgled, funkcionalnost i sigurnost putne komunikacije govori sam o sebi, i govori o potrebi hitne neodložne rekonstrukcije i izgradnje. Niti jedan element saobraćajnice na pomenutom lokalitetu ne karakteriše funkciju i namjenu zbog koje uopšte i postoji. Hitna rekonstrukcija podrazumijeva izgradnju novih kolovoznih traka, izradu proširenja na mjestima za mimoilaženje vozila, uređenje trotoara gdje postoji mogućnost za to, te rješavanje odvodnje oborinskih voda.

Putna komunikacija vezuje nemali broj objekata stanovanja naših građana, naučno obrazovne institucije i njihove objekte, vjerske i sakralne objekte.

Sredstva obezbjediti iz Budžeta Grada Zavidovići, sa Transfera za rekonstrukciju gradskih i prigradskih ulica.“

**Asim Sinanović**

**PREDMET: Vijećnička pitanja**

### **Vijećničko pitanje broj 1**

„Poštovani, u skladu sa Poslovníkom o radu Gradskog vijeća Zavidovići, postavljám dva vijećnička pitanja.

**Prvo** moje pitanje je upućeno Gradonačelnici i nadležnim službama, s obzirom da su najmanje dvije nadležne, a tiče se projekta izgradnje gradskog vodovoda na području Vikovići – Mustajbašići. Mještani navedenog područja su uzeli učešće, te su svojim sredstvima isfinansirali izradu građevinskog projekta, isti je predat u nadležnu službu, riješeni su imovinski odnosi i sada ne znamo šta se čeka, zašto se ne gradi navedeni vodovod? Da vas sve podsjetim mi već petnaest dana nemamo vode, nego se snalazimo dovozeći vodu u kanisterima.

Dakle, gdje je problem i zašto se ne rješava, odnosno kada ćemo dobiti informaciju o gradnji vodovoda?

### **Vijećničko pitanje broj 2**

„**Drugo** moje pitanje također se odnosi na Gradonačelnicu i Službu za društvene djelatnosti, koje glasi:

Prilikom usvajanja Budžeta, dali smo podršku istom i u okviru planiranog Budžeta bio je transfer za nevladin sektor, odnosno civilni dio društva, naša udruženja.

Postavljam pitanje ispred članova nevladinog sektora da li je navedeni transfer izvršen, ako jeste na koji način, koja udruženja su dobila sredstva i u kojem iznosu. Moram dodati da se prostorije svih udruženja u jako lošem stanju, ne radi ni wc pa su im ta sredstva potrebna.

Odgovore tražim u pisanom obliku.“

**Azra Sinanović**

**PREDMET: Vijećnička pitanja**

### **Vijećničko pitanje broj 1**

„U skladu sa Poslovníkom Gradskog vijeća postavljám vijećničko pitanje koje glasi: Prije nekoliko dana bili smo svjedoci ulaska Ortačke grupe u posjed Hotela „Kristal“, a kako sam informisana uskoro će ući i u posjed samog industrijskog kompleksa.

Pitanje je za gradonačelnicu, da li ste informisani i da li ste bilo šta poduzeli da se to spriječi s obzirom da nije plaćena kupoprodajna cijena iz javnog oglasa.

Možete li od Razvojne banke službeno zatražiti informacije da li je plaćena kupoprodajna cijena, ako jeste koliko, a nakon toga da uputite informaciju ili prijavu POSKOKU kako bi oni predmet kupovine IP Krivaja uzeli u obradu jer je to jedini način da spasimo grad s obzirom da mi industrijskog zemljišta nemamo više na raspolaganju.“

### **Vijećničko pitanje broj 2**

„Od strane Vlade ZDK u prethodnom periodu po namjeni sredstava vodnih naknada našem Gradu dodijeljena su sredstva u iznosu oko 270 hiljada maraka.

Interesuje me da li je raspisan javni poziv, ako jeste kada, za utrošak navedenih sredstava i u koje vodovode bi trebalo da budu opredijeljena, s obzirom da imamo nezavršene projekte vodoopskrbe prostorne cjeline Pašin Konak, Rujnica, Bajvati, Beše, Vikovići, Brezik, Brašljevine, Krajnići, Bratanovići i Smailbašići.

Odgovore možete dostaviti u pisanoj formi.“

**Demir Buljubašić:** „Nemam više prijavljenih, te prelazimo na usmene odgovore ako ih ima? Nema. U redu.

Prelazimo na izjašnjavanje na odgovore na vijećnička pitanja sa 9. sjednice.

Pitam vijećnika Sanela Jalmanovića da li je zadovoljan odgovorima? Kolega Jalmanović nije prisutan.

Pitam vijećnika Šemsudina Skejića, da li ste zadovoljni odgovorima na vijećnička pitanja?”

**Šemsudin Skejić:** “Nisam imam dopunsko. Prije dva tri mjeseca postavio sam pitanje koje se tiče vodovoda Rasječenica. Nemojte se iznenaditi ja pratim sve što se dešava za sve vodovode, ne samo za Hajderoviće, jer smatram da je to najvažnije pitanje za naše građane. Nisam zadovoljan odgovorom koji sam dobio, zašto? Informacije su vrlo kontradiktorne u odnosu na one koje smo imali na onoj sjednici kada smo razmatrali posebno vodosnabdijevanje, i ja sam pitao šta se dalje planira po pitanju vodovoda Rasječenica i šta je realizovano. Sa realizacijom nisam zadovoljan s obzirom da je utrošeno milion i 100 hiljada, i mi smo ovdje prije dvije godine donijeli Zaključak da je vodovod završen. Dvije godine nakon toga, a kontra onim informacijama da vodovod treba završiti prvu i drugu liniju, sada se spominje prva, druga, treća i četvrta linija i daje potrebu za realizaciju 2 miliona i 725 hiljada maraka i Grad na kraju kaže planiramo u skladu sa sredstvima koja Budžet Grada ima, i ako dođu sredstva sa Kantona da to nastavimo. Mi smo 11 godina radila onaj milion i 100, sad ova 3 miliona mi ćemo raditi 33 godine. Ovom problemu treba pristupiti malo drugačije, više analitički i stvarno vidjeti šta uraditi. Tamo je predviđeno da se priključi 540 domaćinstava, ajde ima ih stotinjak, oni su privremeni i oni su manja briga, ali i njima treba voda. Mi smo nakon dvije godine završili dva bazena od 100 kubika ...**Demir Buljubašić:** “Gospodine Skejiću, šta je dopunsko pitanje?” ...pa evo tražim da mi se odgovori na ova pitanja, mi smo priključili 540, šta će dalje biti priključeno, hoćemo li mi zaista čekati sada još 3 miliona, pa da počnemo priključivati, ili je to neka informacija zbrda zdola pa nije takva. Znači 103 priključka imamo, a 540 bi trebalo, potrošili smo sredstva za primarni vod, a treba nam 3 miliona. Ovdje treba vidjeti šta ljudi očekuju, ovo kako ide voda gore neće biti završena, možda će prije biti u Hajderovićima. Možda iskustvo Vozuće nešto govori, gore nema pritužbi, gore izgleda sve priključeno zahvaljujući mještanima ili ne znam čemu.”

**Demir Buljubašić:** „Hvala gospodine Skejiću, gospodin Omer Ćosić, da li ste vi zadovoljni odgovorima?”

**Omer Ćosić:** „Da.”

**Demir Buljubašić:** „Hvala, gospodine Šimšiću?”

**Igor Šimšić:** „Da.”

**Demir Buljubašić:** „Hvala, gospodin Hasib Huskić?”

**Hasib Huskić:** „Da.”

**Demir Buljubašić:** „Prelazimo na odgovore na vijećnička pitanja sa 10. sjednice Gradskog vijeća održane dana 30.09.2025. godine. Gospodin Džindo?”

**Asim Džindo:** „Imam dopunsko. Srdačno pozdravljam sve, interesuje me kada će biti potpisana odluka koja se spominje u pitanju? Hvala.”

**Demir Buljubašić:** „Zahvaljujem Džindi, Elvedin Huskić?”

**Elvedin Huskić:** „Zadovoljan.”

**Demir Buljubašić:** „Gospođa Azra Sinanović, da li ste zadovoljni odgovorima?”

**Azra Sinanović:** “Imam dopunsko pitanje vezano za radove koje je proveo JKP „Radnik“ na asfaltiranju površina u gradskom dijelu. Moje dopunsko pitanje glasi: Da li je nadležna služba provela postupak nabavke radova i usluga u skladu sa odredbama Zakon o javnim nabavkama BiH, da li je utvrdila i na koji način da navedenog preduzeće ispunjava Zakonom propisane

uslove za izvršenje navedenih poslova, da li je navedeno Preduzeće opremljeno tehnički i stručno za navedeno poslove, ko je bio zadužena osoba ispred gradske uprave koja je kontrolisala, nadzirala i verifikovala izvršenje navedenih poslova, da li je ta osoba po svojoj stručnosti sposobna da radi te poslove, da li joj je u opisu poslova da nadzire izvršenje i da garantuje izvršenje poslova koji su izvršeni s obzirom da za svaki navedeni posao postoji garancija kvaliteta izvedenih radova ili pruženih usluga. Stoga, uz odgovor na navedeno dopunsko pitanje tražim da nam se dostavi kompletna dokumentacija na osnovu koje su navedenom Preduzeću dodijeljena novčana sredstva i posao koji je vršio, po kojoj cijeni, ovlaštenje osobe za vršenje nadzora nad izvođenjem radova i ocjenu kvaliteta radova, te koji je garantni rok za izvedene radove.”

**Demir Buljubašić:** „Zahvaljujem, a na drugo pitanje, da li ste zadovoljni?”

**Azra Sinanović:** „Zadovoljna.”

**Demir Buljubašić:** „Gospodin Haris Hodžić?”

**Haris Hodžić:** „Nisam zadovoljan i nemam dopunskih.”

**Demir Buljubašić:** „Gospodin Zahid Avdičević?”

**Zahid Avdičević:** „Nisam zadovoljan i nemam dopunskih.”

**Demir Buljubašić:** „Zahvaljujem. Prelazimo na izjašnjenje po vijećničkim inicijativama sa ranijih sjednica.”

#### **a) Inicijativa vijećnika Omera Ćosića za sanaciju i rekonstrukciju Omladinskog doma Potkleče.**

Stav Gradonačelnice Inicijativa se prihvata.

Zamjenik predsjedavajuće daje Inicijativu na glasanje.

Nakon provedenog glasanja, zamjenik predsjedavajuće konstatuje da je Inicijativa sa 25 glasova ZA, 0 glasova PROTIV, 0 glasova UZDRŽANO, dobila potrebnu većinu te je ista usvojena.

#### **Z A K L J U Č A K**

1. Gradsko vijeće Zavidovići prihvata Inicijativu vijećnika Omera Ćosića za sanaciju i rekonstrukciju Omladinskog doma Potkleče.

2. Zadužuje se Gradonačelnica sa nadležnom Službom za realizaciju predmetne Inicijative.

3. Zaključak stupa na snagu danom donošenja, a o njegovoj realizaciji starat će se Služba za upravu društvenih djelatnosti, pitanja boraca i opću upravu.

#### **b) Inicijativa vijećnice Mirele Bašić za sufinansiranje dijela troškova izgradnje planinarskog doma.**

Stav Gradonačelnice Inicijativa se prihvata.

Zamjenik predsjedavajuće daje Inicijativu na glasanje.

Nakon provedenog glasanja, zamjenik predsjedavajuće konstatuje da je Inicijativa sa 25 glasova ZA, 0 glasova PROTIV, 0 glasova UZDRŽANO, dobila potrebnu većinu te je ista usvojena.

#### **Z A K L J U Č A K**

1. Gradsko vijeće Zavidovići prihvata Inicijativu vijećnice Mirele Bašić za sufinansiranje dijela troškova izgradnje planinarskog doma.

2. Zadužuje se Gradonačelnica sa nadležnom Službom za realizaciju predmetne Inicijative.



3. Zaključak stupa na snagu danom donošenja, a o njegovoj realizaciji starat će se Služba za upravljanje društvenih djelatnosti, pitanja boraca i opću upravu.

**c) Inicijativa vijećnice Sanele Dendić za modernizaciju i zamjenu neispravnih rasvjetnih tijela u ulici „Alije Izetbegovića“.**

Stav Gradonačelnice Inicijativa se prihvata.

Zamjenik predsjedavajuće daje Inicijativu na glasanje.

Nakon provedenog glasanja, zamjenik predsjedavajuće konstatuje da je Inicijativa sa 25 glasova ZA, 0 glasova PROTIV, 0 glasova UZDRŽANO, dobila potrebnu većinu te je ista usvojena.

**ZAKLJUČAK**

1. Gradsko vijeće Zavidovići prihvata Inicijativu vijećnice Sanele Dendić za modernizaciju i zamjenu neispravnih rasvjetnih tijela u ulici „Alije Izetbegovića“.

2. Zadužuje se Gradonačelnica sa nadležnom Službom za realizaciju predmetne Inicijative.

3. Zaključak stupa na snagu danom donošenja, a o njegovoj realizaciji starat će se Služba za upravljanje poljoprivrede, vodoprivrede i komunalnih poslova.

**Ad.2** Prijedlog Odluke o davanju na korištenje poslovnih prostorija u vlasništvu Grada Zavidovići Javnoj ustanovi „Kulturno-sportski centar“ Zavidovići.

Uvodno izlaganje: Bez uvodnog izlaganja.

Rasprava: Bez učesnika u raspravi.

Amra Jupić u ime Kluba vijećnika Snaga naroda traži pauzu u trajanju od 5 minuta, zbog konstultacija.

**(pauza 5 minuta)**

Nastavak rada.

Zamjenik predsjedavajuće daje Prijedlog Odluke o davanju na korištenje poslovnih prostorija u vlasništvu Grada Zavidovići Javnoj ustanovi „Kulturno-sportski centar“ Zavidovići na glasanje.

Nakon provedenog glasanja, zamjenik predsjedavajuće konstatuje da je Prijedlog Odluke sa 27 glasova ZA, 0 glasova PROTIV, 0 glasova UZDRŽANO, dobio potrebnu većinu te je isti usvojen.

**Ad.3** Prijedlog Odluke o izmjenama Odluke o nerazvrstanim cestama na području općine Zavidovići.

Zamjenik predsjedavajuće upoznaje Vijeće da je predmetna tačka predviđena da se raspravlja po skraćenom postupku, te otvara raspravu po istom.

Rasprava po skraćenom postupku: Bez učesnika u raspravi.

Zamjenik predsjedavajuće daje prijedlog rasprave po skraćenom postupku na glasanje.

Nakon provedenog glasanja, zamjenik predsjedavajuće konstatuje da je sa 27 glasova ZA, 0 glasova PROTIV, 0 glasova UZDRŽANO, Vijeće prihvatilo da se o predmetnoj tački raspravlja po skraćenom postupku.

**ZAKLJUČAK**

1. Gradsko vijeće Zavidovići prihvata da Prijedlog Odluke o izmjenama Odluke o nerazvrstanim cestama na području općine Zavidovići, raspravlja po skraćenom postupku bez Nacrta.

2. Zaključak stupa na snagu danom donošenja.

Uvodno izlaganje: Bez uvodnog izlaganja.

Rasprava: Bez učesnika u raspravi.

Zamjenik predsjedavajuće daje Prijedlog Odluke o izmjenama Odluke o nerazvrstanim cestama na području općine Zavidovići, na glasanje.

Nakon provedenog glasanja, zamjenik predsjedavajuće konstatuje da je Prijedlog Odluke sa 27 glasova ZA, 0 glasova PROTIV, 0 glasova UZDRŽANO, dobio potrebnu većinu te je isti usvojen.

**Ad.4** Razmatranje Inicijative Mjesne zajednice „Branioci grada“ za formiranje komisije.

Uvodno izlaganje: Bez uvodnog izlaganja:

Rasprava: Bez učesnika u raspravi.

Zamjednik predsjedavajuće predlaže sljedeći:

#### ZAKLJUČAK

1. Gradsko vijeće Zavidovići prihvata Inicijativu Mjesne zajednice „Branioci grada“ za formiranje Komisije za rješavanje spornog pitanja korištenja putne komunikacije za odvijanje saobraćaja preko naseljenog mjesta Majdan (Gornje selo) za naseljeno mjesto Alići.

2. Gradsko vijeće Zavidovići zadužuje Gradonačelnicu sa nadležnom Službom za realizaciju predmetne Inicijative.

3. Zaključak stupa na snagu danom donošenja, a o njegovoj realizaciji starat će se Služba za upravu privrede, lokalni razvoj, infrastrukturu i međunarodnu saradnju.

Rasprava po Zaključku: Bez učesnika u raspravi.

Zamjenik predsjedavajuće daje Zaključak na glasanje.

Nakon provedenog glasanja, zamjenik predsjedavajuće konstatuje da je Zaključak sa 27 glasova ZA, 0 glasova PROTIV, 0 glasova UZDRŽANO, dobio potrebnu većinu te je isti usvojen.

#### ZAKLJUČAK

1. Gradsko vijeće Zavidovići prihvata Inicijativu Mjesne zajednice „Branioci grada“ za formiranje Komisije za rješavanje spornog pitanja korištenja putne komunikacije za odvijanje saobraćaja preko naseljenog mjesta Majdan (Gornje selo) za naseljeno mjesto Alići.

2. Gradsko vijeće Zavidovići zadužuje Gradonačelnicu sa nadležnom Službom za realizaciju predmetne Inicijative.

3. Zaključak stupa na snagu danom donošenja, a o njegovoj realizaciji starat će se Služba za upravu privrede, lokalni razvoj, infrastrukturu i međunarodnu saradnju.

**Ad.5** Razmatranje Inicijative Udruženja građana „Jedinstveno udruženje demobilisanih boraca '92. — '95." Zavidovići za donošenje Odluke o imenovanju i proglašenju u naziv (Trg heroja odbrambeno-oslobodilačkog rata) prostor centralnog Spomenika poginulih boraca 92/95.

Uvodno izlaganje: Bez uvodnog izlaganja.

Rasprava: Hasib Huskić.

Zamjednik predsjedavajuće predlaže sljedeći:

## ZAKLJUČAK

1. Gradsko vijeće Zavidovići prihvata Inicijativu Udruženja građana „Jedinstveno udruženje demobilisanih boraca '92. – '95.“ Zavidovići za donošenje Odluke o imenovanju i proglašenju u naziv (Trg heroja odbrambeno-oslobodilačkog rata) prostor centralnog Spomenika poginulih boraca 92/95., broj: 19/2025-UO-S-19 od 17.07.2025. godine.

2. Zadužuje se Gradonačelnica sa nadležnom službom da realizuje predmetnu Inicijativu

3. Zaključak stupa na snagu danom donošenja, a o njegovoj realizaciji starat će se Služba za upravu društvenih djelatnosti, pitanja boraca i opću upravu, te Služba za upravu geodetskih, imovinskopравnih poslova i urbanizam.

Rasprava po Zaključku: Bez učesnika u raspravi.

Zamjenik predsjedavajuće daje Zaključak na glasanje.

Nakon provedenog glasanja, zamjenik predsjedavajuće konstatuje da Zaključak sa 6 glasova ZA, 11 glasova PROTIV, 7 glasova UZDRŽANO, nije dobio potrebnu većinu te isti nije usvojen.

## ZAKLJUČAK

1. Gradsko vijeće Zavidovići odbija Inicijativu Udruženja građana „Jedinstveno udruženje demobilisanih boraca '92. – '95.“ Zavidovići za donošenje Odluke o imenovanju i proglašenju u naziv (Trg heroja odbrambeno-oslobodilačkog rata) prostor centralnog Spomenika poginulih boraca 92/95., broj: 19/2025-UO-S-19 od 17.07.2025. godine.

2. Zaključak stupa na snagu danom donošenja.

Sjednica zaključena u 16:50 sati.

ZAPISNIK SAČINIO

dipl. iur. Dženan Ćatić

OVJERAVA

SEKRETAR GV- a

Samira Pinjić, dipl. pravnik

PREDSEDavajuća

GRADSKOG VIJEĆA

Amira dr Hadžić, spec. radiolog